

AKASHVANI AIZAWL

REGIONAL NEWS BULLETIN

HEADLINES (MORNING)

1. Union Minister Pu Rajiv Ranjan Singh a'n Sangha khawi, Ran vulh leh Bawnghnute thar kawnga eizawna tih hmasawn anih theihnan hmarchhak bial ten theihna nasa tak an nei tih a sawi.
2. Indian Meterological Dept New Delhi hmuh lawk danin Mizoramah vawiin atangin fur a intan a, thuneituten chhiatna thleng thei lakah mipuite fimkhut turin an chah a ni.
3. Assam state sawrkar chuan nimin khan state Assembly ah Uniform Civil Code Bill a pulut
4. External Affairs Minister Dr.S.Jaishankara'n vawiin hian New Delhi-ah Quad Foreign Ministers' Meeting a thleng dawn.

<><><>

REGIONAL REVIEW MEETING

Union Minister Pu Rajiv Ranjan Singh a'n Sangha khawi, Ran vulh leh Bawnghnute thar kawnga eizawna tih hmasawn anih theihnan hmarchhak bial ten theihna nasa tak an nei tih a sawi.

Nimin khan Mizoram tlawha lo zin mek Union Minister of Fisheries, Animal Husbandry and Dairying Pu Rajiv Ranjan Singh kaihhruaiin hmarchhak state pariat (8) te chuan High Court Hall, MINECO-ah hmarchhak state-te hmalakna leh sawrkar laipui hnuaiia scheme hrang hrang hman tangkai dante thlir hona (Regional Review Meeting) an nei a. Minister Pu Rajiv Ranjan Singh chuan sawrkar laipui chuan hmarchhak state-te mawina leh nihphung hrang hrangte phochhuah a duh thu sawiin Mizoram mawina inthup mawi tak mai a hmu chhuak chu nuam a tih thu a sawi bawk. Prime Minister Narendra Modi-a'n hmarchhak bial hmasawna tura hmachhawp a neih chu tarlangin, Central Sawrkar chuan chu a hmahlir tih puitlin anih theih nan a theih apiang tih a duh thu a sawi a. Sangha khawi, Ran vulh leh Bawnghnute thar lama hmasawna hian hmarchhak bialah eizawna kawnga hmasawna tha tak a thlen theih thu sawiin Ran vulh leh Bawnghnute thar kawnga eizawna tih hmasawna anih theihnan hmarchhak bial ten theihna nasa tak an nei tih a sawi.

Minister of State Pu George Kurian pawhin thu sawiin, Fisheries, Animal Husbandry and Dairying Ministry chu hmarchhak mipuiten an eikhawp an hmuh theihna atan te, Hmeichhiate dawmkanna atan leh kutkawiha eizawngte hmasawna tur ani a ti a, Hmarchhak state-te chu intodelh tura fuihin an state tharchhuahte chawilar lehzual turin a sawm a ni.

Nimina thutkhawmah hian kum 2014 atanga kum 2025 inkarah Mizoram chuan sangha khawi kawnga hmasawna atan cheng vaibelchhe 246.79 a hmuh thu tarlan ani a, sawrkar laipui chuan cheng vaibelchhe 2,228 zet hmarchhak state-te a lo pek tawh thu tarlan a ni bawk.

Nimina thutkhawmah hian Mizoram atangin Fisheries Minister Pu Lalthansanga bakah sawrkar mi pawimawh hrang hrang an tel a ni.

(Desk)

<><><>

MZP

Mizo Zirlai Pawl MZP chuan nimin khan Tourism Department Director atana sorkarin Pi R Lalrodingi a ruat nawn duh lohna lantirin Tourism Directorate-a thawkte pisa kai tur an dang a; Tourism Director hi a bang emaw, ruat nawna order hi sût emaw a nih loh vawiinah dan chhunzawm an rel.

Nimina Tourism Directorate pisa kai dannah hian MZP hian kawngkapui chu tala-in an kalh a, hrui pawtin Tourism Director ruat nawna sût an duh thu leh mimal induhsakna an duh loh thute an tar a; police engemawzat an duty bawk. Buaina leh harsatna thleng loin tlai dar 4 khan pisa kai tur dan hi an titawp a; Tourism Director hi a bang emaw, ruat nawna order hi sût emaw a nih loh chuan vawiin dar 7 leh a chanve ah Tourism Directorate pisa kawtah punkhawm leh an rel a ni.

MZP-in Tourism Directorate-a pisa kai turte an dannaah hian MZP President Pu C Lalremruata chuan, an hmalakna chu a mimala Pi R Lalrodingi an huat vang a nih loh thu leh mimal induhsakna lian tak a awm nia lang chu an duh loh ber a nih thu a sawi a, MZP chuan tun hma atang tawhin sorkar hnathawk pension rawih nawn hrim hrim hi an duh lo tawh thin a, thalai hna zawng mekte tan leh zirlai hmabak êng tak tak neite tan inrawih nawna hi an duh lo tih sawiin, sorkar pawhin an hmalakna leh an aw a ngaihlak ngei an beisei thu a sawi.

<><><>

WEATHER

Indian Meteorological Dept New Delhi hmuh lawk danin Mizoramah vawiin atangin fur a intan a, thuneituten chhiatna thleng thei lakah mipuite fimkhut turin an chah a ni.

Mizoram telin India Hmarchhak state hrang hrang leh Kerela ah te chuan ni 6 in fur hi a lo thleng hma dawn a, IMD, Aizawl Director Pu Sudheer Kumar Dwivedi-a chuan kum dangah chuan fur hi June thla bulah a intan thin a, kuminah erawh naktuk ni 26 ah a intan dawn ni a hmuhlawk a ni a ti a, Fur intan hun tur hi chhut dan chi hrang hrang a awm a, Arabian Sea leh Bay of Bengal a thli beng lama zir te leh ruahsur dan a zir te in a ni a, he an chhutna atang hian IMD chuan fur intan tur thu hi a puang a ni.

Leimin tamna Mizoramah chuan mipuite fimkhur turin IMD Director chuan a chah a, hei bakah hian lirthei khalhtute pawh fimkhur turin a chah bawk a ni.

<><><>

PETROL PRICE HIKE

Rampumah tuialhthei man a pung leh a, Aizawlah chuan petrol hi litre-1 cheng106.39 leh diesel litre-1 cheng 95.07 a ni mek a ni.

All Mizoram Petroluem Dealers Association (AMPEDA) President Pu K Lalngkhakliana chuan petrol leh diesel-ah lungngaihna tur a awm loh thu a sawirualin, Mizoramin tuialhthei dahkhawmna (oil depot) a mamawh thu a sawi.

Tunhnaiah India ramah tuialhthei man a che nasa hle a, tunthla ni 15 khan a vawi khat nan chein, vawiin thleng hian ni 11 chhungin vawi 5 a danglam tawh a ni. Tukina tuialhthei man punna hi litre khatah petrol Rs 2 leh pawisa 58 a ni a, diesel chu Rs 2 leh pawisa 56 a ni.

Akashvani News Aizawl zawhna chhangin AMPEDA President Pu K Lalngkhakliana tunthla ni 15 khan petrol man Rs 3 leh pawisa 02 leh diesel man Rs 2 leh pawisa 89-in a pung a, kha kha a pun san ber niin tukina a punna hi a sang ber dawttu a ni, a ti a; May 16 khan petrol leh diesel man hi pawisa 6 ve vein tlahniam leh mahse, May ni 18 khan pawisa 80 ve vea a pun thu leh May ni 23, Inrinni khan litre khatah petrol pawisa 85 leh diesel pawisa 86-in a pun leh thu a sawi.

Phai lam atanga tuialhthei an lakna lamah harsatna lian tham a awm rih loh thu sawiin Pu K Lalngkhakliana chuan, an duh anga tam erawh vawi 1-ah phurh theih loh chang an neih thu a sawi a; Mizoramin tuialhthei dahkhawlna Oil Depot a la neih ve lo chu AMPEDA chuan an ngaimawh thu leh sorkar hotute hnenah pawh an thlen fo tawh thu a sawi a, Mizoramin oil depot a neih vat theih nana hma la thuai turin sorkar hotute a ngen nghal bawk.

<><><>

TRAFFIC

Aizawl Traffic Police chuan dan bawhchhiatna hrang hrang avanga khawpui chhunga lirtheia chetsualna thleng thin titem tur leh mipui him zawk nan Aizawl khawpui chhung hmun hrang hrangah lirthei endikna Special Drive an nei a; kar liamta Inrinni zan khan lirthei dan bawhchhia 74 an man.

Aizawl Traffic additional SP Pu Saidingliana Sailo chuan Akashvani News Aizawl zawhna chhangin, Special Drive hi May ni 23 zan khan an neih tan thu leh neih chhoh zel an tum thu a sawi a; mipui atangin thlawpna a that avangin a remchan dan angin neih chhoh zel a ni dawn a, a hun leh hmun tur erawh sawi lawk theih a ni lo, a ti a; lirthei khalhtute chu fimkhur tur leh mipui kawng kalte pawh fimkhur taka kawng kân thin turin a chah a ni.

Inrinni zan dar 9 hnu lam atangin Aizawl Traffic Police-te hian Special Drive hi an nei a, a tuk Pathianni zing lam thleng an duty a ni. Special drive-ah hian bike ri ring chi 12, license nei loa lirthei khalh 12, chak lutuk leh midang tana hlauhawm taka lirthei khalh 3, rui chunga lirthei khalh 4 leh helmet khum lo leh wrongside-a tlan bakah two wheeler-a mi 3 inphura tlan 43 an man bawk.

(Johny-CORR)

<><><>

HOME MINISTER

Home Minister Pu K Sapdanga chuan police 350 lak leh tumin Mizoram sorkar a inbuatsaih mek tih sawiin, fair taka lak leh a nih dawn thu leh nikuma police 259 lak zingah ruihtheihthila buai an awm lo tih a sawi.

Pu K Sapdanga hian nimin khan Aizawla ZPM pisaa chung inkhawmah thu sawiin, sorkarin a phal angin police 350 lak leh tum a nih thu a sawi a, police (un-armed) 150 leh silai keng chi -armed 200, a vaiin 350 lak leh an tum a, nikumah fair takin lak a ni a, tuna lak leh tur pawh hi a fair leh hle ang, a ti.

Nikuma police 259 lakte chu an kawng kal dan atang ringawt pawhin an training tha tih a lan thu sawiin Pu K Sapdanga chuan, training chungin ruihtheihthila buai an awm lo tih a sawi a; police-te inthunna leh fitness-ah tan an lak leh zual dawn thu a sawi. Police zingah lirthei emaw, ardali emaw, danin a phal chin aia tam kawl an awm tawh lo nia an hriat thu sawiin, lo kawl ru an awm a, man chhuah palh an awm chuan langsar taka hrem an nih dawn thu a sawi.

(PR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

UCC

Assam state sawrkar chuan nimin khan state Assembly ah Uniform Civil Code Bill a pulut. He bill hian nupui pakhat aia tam neihte a khap dawn a. Innei siloa khawsa dunte pawh sawrkarin a chhinchhiah tawh dawn a. Hetihlai hian he bill hian Assam state chungina Scheduled Tribes te a huam a dawn lo a ni. He bill ah hian innei turin mipa tan kum 21 leh hmeichhe tan kum 18 tlin ngei ngei a ngai dawn a. Nupui/pasal pakhat aia tam neih polygamy a khap a. Hei bakah hian innei leh inthen zawng zawngte sawrkarah an inziahluh a ngai dawn a. Hei hian dan hnuaia hamthatna leh ro khawm chungchang thlengin a venghim thei dawn a ni.

Uniform Civil Code Bill 2026 hi State Cabinet Minister Atul Bora chuan house ah a pulut a. Heti hian Assam chu hmarchhak state zingah Uniform Civil Code bill pulut hmasa ber a ni a. Kum 2026 Assembly inthlana an manifesto pakhat tihhlawhtlinna tur a ni a. Tun thla ni 13 a State Cabinet thukhawm chuan he bill hi house a putlul turin a lo pawm tawh a ni.

(Newsonair)

<><><>

QUAD

External Affairs Minister Dr.S.Jaishankara'n vawiin hian New Delhi-ah Quad Foreign Ministers' Meeting a thleng dawn. He hunah hian Australia Foreign Minister Penny Wong, Japan Foreign Minister Toshimitsu Motegi leh US Secretary of State Marco Rubio te an tel dawn a ni.

Thutkhawmah hian Quad ramte thawhhona hrang hrang thlirho a ni ang a. Hmasawna lai te sawiho niin tunhnaia Indo-Pacific chhehvela thilthleng leh khawvel thil thleng pawimawhte an ngaihtuah ang.

Quad ah India, US, Australia leh Japan te member an ni a. Indo-Pacific chhehvela remna leh muanna, venhimna chungchangah an thawkho a ni.

(Newsonair)

<><><>